

Listovi...

## LISTOVI GRAČANIČKOG KALENDARA OD 16. 5. DO 31. 10. 2003.

**22. 5. 2003.**

**UMRO SALIH OSMANBEGOVIĆ**

Rođen je 1925. godine u Gračanici, napredni omladinac, Titov partizan, jedan od posljednjih iz stroja Prve proleterske, pukovnik JNA, nosilac "Partizanske spomenice 1941.", nagrade ZAVNOBiH-a i drugih mnogobrojnih ratnih i mirnodopskih, predsjednik SUBNOAR-a BiH, jedan od posljednjih predsjednika Udruženja Gračanlija u Sarajevu... Ukopan je 23. 5. 2003. godine na groblju Bare u Sarajevu. U ime Gračanice, posljednji se od nje ga oprostio Alija Gazibegović, predsjednik gračaničkog SUBNOAR-a.

**25. 5. 2003.**

**DANI GRAČANICE: 25. 5. - DAN ODBRANE.**

**2. 6. - DAN OPĆINE**

Nizom kulturno-umjetničkih i sportskih programa, te uz ostale prigodne sadržaje, i ove godine obilježena su dva najznačajnija datuma iz kalendara općine Gračanica. Bila je to svojevrsna smotra kulturnog stvaralaštva učenika osnovnih i srednjih škola u gradu, muzičke škole i obdaništa, te nekoliko kulturno-umjetničkih i sportskih društava. Izdvajamo smotru saza "Zlatne strune Bosne", koja će, vjerovatno, postati tradicional-

**LISTAO  
OMER HAMZIĆ**

na, zatim samostalnu likovnu izložbu Milene Šabić iz Gračanice, rad likovne radionice "Crtam – slikam svoj zavičaj" Udrženja građana "Forum" Gračanica, izložbu fotografija i napisa iz štampe o humanitarnoj pomoći iz Francuske, sportskoj i drugoj saradnji sa Gračanicom, koju je priredilo Dino Čolić iz Gračanice, memorijalno takmičenje radioamatera "Nedžib Čeljo", večeri rok muzike, vatromet itd.

**27. 5., 2003.**

### **PUŠTEN U POGON PERADARSKI KOMPLEKS "KOKO DŽADA" PRIBAVA**

Time je obilježen završetak jedne od najvećih proizvodnih investicija na području općine Gračanica u periodu od Dejtona do danas. Riječ je o proizvodnom kompleksu od 8,5 hilja-

da kvadratnih metara uređenog prostora, na kojem je izgrađen proizvodni kapacitet od 4.979 kvadratnih metara pokrivenog prostora sa najsavremenijom tehnološkom opremom u oblasti uzgoja i proizvodnje pilećeg mesa. U tom pogonu zaposlenje će naći 23 nova radnika, tovit će se 80.000 komada brojlera i proizvoditi 160 tona, takozvane žive mjere u jednom turnusu, odnosno 960 tona godišnje. Odavde će se, dakle, tržištu isporučivati oko 750 tona pilećeg mesa visokog kvaliteta, u vrijednosti od cca 2 miliona KM godišnje.

U investiciju je uloženo 2,5 miliona KM, većim dijelom iz bankarskih i drugih izvora, uz 30% vlastitog učešća firme.

Ovi proizvodni kapaciteti u potpunosti se uklapaju u postojeću, ali i u projektovanu dugoročnu koncepciju razvoja peradarstva na području



Peradaraski kompleks "Koko džada" u Pribavi

gračaničke, ali i šire regije. Prva faza tog koncepta je zaokružena kupovinom moderne klaonice u Živinicama, koja je sastavni dio preduzeća "Koko džada". Ovo su kapaciteti koji će biti u stanju finansirati i otkupiti kompletnu proizvodnju žitarica na Tuzlanskom kantonu. Ovo će biti snažan podsticaj za razvoj primarne poljoprivredne proizvodnje na našem području.

Tko je na najbolji način obilježeno je 25 godina od samog začetka ideje o mogućnostima peradarske proizvodnje na prostoru gračaničke općine. Otada do danas, kada peradarstvo na neki način postaje zaštitni znak Gračanice, na čelu tog velikog projekta bio je Reuf Sokolović, koji je, govoreći na svečanom otvaranju pomenutih objekata, o tome, između ostalog, rekao: "Ja sam vjerovao u ovaj projekat. Srećom, nisam bio sam, uz sebe sam imao vrijedne i pametne ljude, imao sam ekipu koja je znala šta hoće i šta može. Prilika je da im se i na ovaj način zahvalim. U suštini, mi smo bili svjesni, što ne reći, da radimo prije svega za sebe i za svoju porodicu, za sredinu u kojoj živimo, a onda i za širu zajednicu, općinu i dalje..."

**29. 5. 2003.**

**TRIDESET ČETVRTA SJEDNICA OPĆINSKOG VIJEĆA GRAČANICA: DONESENA ODLUKA O NAČINU FINANSIRANJA IZGRADNJE, REKONSTRUKCIJE, SANACIJE I ODRŽAVANJA PUTNE MREŽE NA PODRUČJU OPĆINE GRAČANICA**

... zatim izvještaji i informacije o radu u 2002. godini: Općinskog

pravobranilaštva i JP "Komus", Općinskog suda, Općinskog suda za prekršaje, Biroa za zapošljavanje te informacije o materijalno-socijalnom položaju porodica šehida i palih boraca, ratnih vojnih invalida, demobilisanih boraca i pripadnika NOR-a 1941.-1945. i Informacija o stanju lokalne putne mreže i signalizacije na općini Gračanica u 2000.

**2. 6. 2003.**

**SVEČANA AKADEMIJA POVODOM 2. JUNA - DANA OPĆINE GRAČANICA**

Učinjen je napor da se u koncipiranju Programa akademije razbiju dosadašnji stereotipi i unesu novine u skladu sa dosadašnjim pozitivnim iskustvima i savremenim društvenim kretanjima. Cilj je bio da se potvrdi vjekovna postojanost države Bosne i Hercegovine, tradicija i prošlost grada Gračanice sa svim njenim kulturno-historijskim i savremenim karakteristikama, da se istaknu pozitivna dostignuća i jasno izraze planovi za budućnost, unese optimizam i spoznaja da se može kvalitetnije živjeti na ovim prostorima. Posebnu pažnju publike i gostiju privukla je multimedijalna prezentacija "Gračanica jedna i jedina", koja je na neki način bila zamjena za klasični svečani referat i uobičajenu "govoranciju". Uz posebno odabran kulturno-umjetnički program i originalnu režiju, koju je osmislio Muharem Osmić, prvak drame Narodnog pozorišta iz Tuzle, značajne novine unesene su i u protokol dodjele općinskih priznanja. Dobitnici tih priznanja za ovu godinu su: Zlatna plaketa općine Gračanica: Mjesna



*Služba hitne pomoći Gračanica*

zajednica Miričina, Mjesna zajednica Malešići; Srebrena plaketa općine Gračanica: Samostalna zanatska radnja "Limorad" Gračanica, DOO "Roading" Gračanica, Zemljoradnička zadruža "Gračanka"; Zlatna značka općine Gračanica: Helić Nusret iz Gračanice, Bravić Amira iz Gračanice i Brkić Hasan iz Gračanice; Srebrena značka općine Gračanica: Šerbečić Alađa iz Džakula, Avdić Suada iz Gračanice, Nurić Zajim iz Škahovice, Gazibegović Sead iz Gračanice i Moralić Nedim iz Gračanice.

**2. 6. 2003.**

### **OTVORENE NOVE PROSTORIJE STANICE HITNE POMOĆI DOMA ZDRAVLJA U GRAČANICI**

U izgradnju Stanice hitne pomoći i adaptaciju drugih prostora (služba medicine rada, laboratorija, prostor između Opće bolnice i Doma zdravlja) uloženo je preko 370.000 KM. U

isto vrijeme, izvršena je nabavka neophodne medicinske i druge opreme u vrijednosti od 338.000 KM.

**13. 6. 2003.**

### **"KAKO VOLI DRUGA STRANA": DRAMSKI STUDIO KUD-A "ADEM ALIĆ" IZVEO SVOJU PRVU PREMIJERU**

Izvanrednu komediju Alana Ayckborna, na pozornici gračaničkog Doma kulture, izvela grupa glumaca-amatera pod rukovodstvom mladog reditelja Miralema Džaferovića, čiji je otac, rahm. Hasib, bio nekada prvak gračaničke pozorišne scene. Na najbolji način ljubiteljima pozorišne umjetnosti ovoća puta predstavili su se: Hasiba Grbešić, Mirsada Beganović, Albina Junuzović, Nedžad Đuvić, Mirza Đulić i Smajo Hasić. Ekipa koja obećava...

21. 6. 2003.

## GRAČANICA DOMAĆIN DRŽAVNOG PRVENSTVA BIH U BICIKLIZMU "GRAČANICA 2003."

Na prvenstvu je učestvovalo 56 takmičara iz sljedećih bosanskohercegovačkih klubova: "Jedinstvo" i "Zmaj od Bosne" iz Tuzle, BSK iz Banja Luke, "Sana 95" iz Sanskog Mosta, "Zenica-Metalno" iz Zenice, "Bosna" iz Sarajeva i "Prijedor" iz Prijedora. U disciplini "Brdska vožnja", na stazi od Nogometnog stadiona "Bratstvo" Gračanica do prevoja Bukva na putu Gračanica – Srnice, u dužini od 9.200 m, kako je izvijestio Fikret Konjić, novinar Radio Gračanice, najuspješniji u kadetskoj konkurenciji bio je Mirsad Jusić ("Zmaj od Bosne"), a u juniorskoj konkurenciji pobjednik je Milan Jakšić ("Prijedor"). Što se tiče seniora, najbolji je bio, kako se i očekivalo, kapiten bosanskohercegovačke reprezentacije Samir Kovačević ("Jedinstvo"), koji je na cilj stigao u vremenu od 19,50 minuta, drugi je bio Elvis Jahić ("Zenica-Metalno" u istom vremenu, a treći Albedin Žigić ("Zmaj od Bosne") u vremenu od 19,57 min.

U utrci su učestvovali i veterani, među kojima je najuspješniji bio Goran Kalaba (BSK Banja Luka).

U disciplini "Vožnja na hronometar" na stazi dužoj 2.000 m (Sočkovački put), od kadeta najbolji je bio Nedžad Karabeg ("Sana 95"), među juniorima Nikola Soković (BSK), a među veteranima Goran Kalaba (BSK). U seniorskoj konkurenciji, poredak je bio sljedeći: Samir Kovačević ("Jedinstvo"), Elvis Jahić ("Zenica Metalno") i Adnan Bečić ("Jedinstvo").


Nakon zvaničnih takmičenja, učesnici utrke, skupa sa učenicima osnovnih i srednjih škola i rekreativcima

iz Gračanice, za građanstvo su "vozili" nekoliko promotivnih krugova kroz centar Gračanice – koja se, kao i obično, pokazala i ovoća puta kao izvrstan domaćin.

26. 6. 2003.

## POGON TVORNICE OBUČE "FORTUNA" U LUKAVICI

U tom pogonu "Fortuna" je za početak usrećila 32 radnika, potom slijedi proširenje... Slične pogone direktor ove mnogoljudne gračaničke firme Safet Pjanić, u svojoj izjavi za Radio Gračanicu, najavio je u još nekoliko sela gračaničke općine. Davnašnji planovi takozvane disperzije proizvodnje u ovoj tvornici tek sada se na najbolji način realizuju...



1. 7. 2003.

**OTVORENE "LJETNE VEČERI POD LIPAMA  
GRAČANICE 2003."**

Riječ je o kulturno-sportskoj manifestaciji koja se po prvi puta na ovakav način organizuje u Gračanici. Općina Gračanica je glavni pokrovitelj i sponzor, a Bosanski kulturni centar realizator ovog svojevrsnog kulturno-sportskog maratona. Zamišljeno je da se nizom kulturno-sportskih sadržaja, tokom jula i augusta, razbije uobičajeno ljetno mrtvilo u gradu, te da se oživi uže gradsko jezgro kao pozornica svih tih dešavanja.

"Cilj nam je da podignemo kvalitet života u Gračanici na viši nivo, da ohrabrimo, a ako hoćete i da probudimo neke naše institucije i organizacije koje su zadužene da se intenzivnije bave ovim i ovakvim poslovima. Ovo je, na neki način, i početak afirmisanja turističke ponude Gračanice. U konačnici, sve to i treba da bude u funkciji boljeg življenja građana i biznisa", rekao je Nusret Helić, načelnik Općine Gračanica, otvarajući tu manifestaciju.

9. 7. 2003.

**TRIDESET PETA SJEDNICA OPĆINSKOG VIJEĆA  
GRAČANICA: USVOJEN NOVI GRB OPĆINE I IZVJEŠTAJ  
O REALIZACIJI STRATEGIJE RAZVOJA OPĆINE**

Na javni konkurs prispjelo je 13 prijedloga idejnog rješenja grba (pod šifrom), od kojih je posebna komisija jednoglasno odabrala rješenje pod šifrom "Studio M" (autor Mev-



*Grb opštine do 1996. godine*



*Grb opštine od 1996.-2003. godine*



*Grb opštine danas*

ludin Kavgić iz Gračanice). Izbor Komisije potvrdilo je i Općinsko vijeće, donoseći odluku o izmjeni i dopuni Odluke o grbu i zastavi Općine Gračanica. Za Odluku su glasali svi prisutni članovi Općinskog vijeća (s jednim "suzdržanim" glasom). U obrazloženju ovog novog simbola Gračanice, između ostalog, zapisano je sljedeće: "Grb je urađen u obliku klasičnog srednjovjekovnog štita na zlatnoj podlozi. Centralni dio grba zauzima najpoznatiji simbol Gračanice, Sahat kula, u čistom grafičkom obliku. Kula je u sjeni dvije lipe koje su također jedan od prepoznatljivih simbola Gračanice, te ih obavezno treba uvrstiti u sadržaj grba. U pozadini navedenih simbola dominira silueta srednjovjekovne utvrde, koja predstavlja početak duge urbane tradicije ovoga kraja, sa utvrdom drvenog grada Sokola. Donji dio grba zauzima grafički reduciran izgled vode, nadzemnih i termalnih, kojima Sprečko polje obiluje. Zelena ravnina ispod Sahat kule simbolizira Sprečko polje i tradiciju ratarstva."

**25. 7. 2003.**

**NEZAPAMČENO NEVRIJEME U GRAČANICI,  
VJETAR ČUPAO STABLA LIPA PO GRAČANIČKIM  
PARKOVIMA**

Stariji Gračanlije nisu upamtili takvo nevrijeme u ovo doba godine. Materijalne štete, posebno na poljoprivrednim usjevima i voću su velike. Srećom, ljudskih žrtava nije bilo.

**20. 8. 2003.**

**AVDIĆI I DOBRNJIĆI U GORNJOJ ORAHOVICI  
DOBILI ASFALT**

Asfaltirano je 2.300 metara puta koji pomenute dvije mahale povezuje sa centrom sela. Od ukupno uloženih 200.000 KM, mještani su obezbijedili 80, a Općina Gračanica i kantonalna direkcija za puteve po 60.000 KM.

**28. 8. 2003.**

**ZAVRŠENE "LJETNE VEČERI POD LIPAMA  
GRAČANICE 2003."**

Oko tridesetak različitih kulturno-sportskih sadržaja izvedeno je tokom jula i augusta u centru Gračanice i na bazenima i igralištima oko grada, a najviše na mjestu gdje to i priliči: pod svodovima prekrasnog zdanja moćnih kapetana Gradaščevića, koje još uvijek na svoj način svjedoči o Gračanici kao o čaršiji kulture, nauke, obrazovanja... Odavno jedna manifestacija nije doživjela takvu podršku, odobravanje i pohvale Gračanlija. Nije ni čudo: bilo je za svakog ponešto, ali sve to na zavidnom nivou kvaliteta i organizacije - od naših tradicionalnih sevdalinki, ilahija i kasida, pa do klasične gitare i poezije, rok i folk-muzike, od velikog turnira u malom nogometu do sportsko-zabavnih igara na bazenima oko Gračanice.

Programi su bili pretežno zabavni i sportsko-rekreativni, lakši po žanru, prihvatljivi za sve kategorije publike: slučajne šetače u gradu, prolaznike, posjetioce gradskih terasa, goste Gračanice.

Gotovo cjelokupan program realizovan je "vlastitim, to jest, snagama iz vlastite sredine" – što nimalo nije umanjilo njegov kvalitet i visoke zahtjeve koji su postavljeni od strane Općine Gračanica, kao glavnog sponzora i pokrovitelja manifestacije. U vezi s tim, na zatvaranju manifestacije, najavljujući "Ljetne večeri pod lipama Gračanice 2004.", načelnik općine Nusret Helić, između ostalog rekao je i ovo: "Siguran sam da Gračanica, uz sve poduzetničke prednosti, ima snage da pravilno usmjeri i afirmiše i svoje potencijale u oblasti kulture, zabave i sporta i da se s pravom oslanja na mlade kojima, konačno, moramo dati priliku da već jednom postanu budućnost ove zemlje."



*Džamija u Piskavici*

**7. 9. 2003.**

### **OTVORENA DŽAMIJA U PISKAVICI**

Na svečanost je došao veliki broj vjernika s područja gračaničke i drugih općina, da podijele radost sa džematlijama Piskavice, koji do sada nisu imali džamiju. Među brojnim uglednim gostima bio je i naibu-reis Ismet ef. Spahić, koji se prisutnima obratio prigodnim govorom. Noć uoči otvorenja džamije, poslije akšam-namaza, izveden je prigodan mevludski program.

**16. 9. 2003.**

### **SEAD KORJENIĆ NOVI PREDsjedNIK STRANKE ZA BIH U GRAČANICI**

To je većinom glasova odlučio Savjet ove stranke, koja se, očigledno, prestrojava i priprema za lokalne izbore, iako nas od njih dijeli čitava godina.

**17. 9. 2003.**

### **"KOKO-DŽADA" GRAČANICA: OTVORENA NOVA KLAONICA U ŽIVINICAMA**

...dnevnog kapaciteta 15.000 komada pilića, opremljena najsavremenijim uređajima i opremom za proizvodnju i pakovanje pilećeg mesa. Time je ova renomirana gračanička firma stekla uslove za izvoz piletine na probirljivo inozemno tržište, što otvara mogućnosti daljeg proširenja kapaciteta u primarnoj proizvodnji, kako na području gračaničke, tako i na drugim općinama Tuzlanskog kantona.



19. 9. 2003.

### **ASFALT NA DRAFNIĆIMA I DUDIĆU**

Na skromnoj svečanosti povodom završetka tih akcija, odgovorni su nagovijestili nastavak rekonstrukcije i asfaltiranja gradskih saobraćajnica u ostalim mahalama. Sve će zavistiti od obezbjeđenja vlastitog učešća i samorganizovanja građana. Drafnićani su u tome uvijek služili za primjer, rečeno je na spomenutoj svečanosti.

23. 9. 2003.

### **TRIDESET ŠESTA SJEDNICA OPĆINSKOG VIJEĆA GRAČANICA: IZVRŠENJE BUDŽETA OPĆINE ZA PRVO POLUGODIŠTE 2003. GODINE**

...nije pobudilo neku značajniju pažnju vijećnika zbog toga što se u oblasti budžetske potrošnje i budžeta stanje ocjenjuje kao "redovno", iako po iskazanim ciframa možda to i nije. Ukupan prihod ostvaren je u iznosu od 2.271.587 KM, ukupni rashodi iznose 2.158.680 KM. Razlika od 112.907 KM utrošena je za izmirenje obaveza iz ranijeg perioda. U odnosu na plan, ostvarenje je manje za cca 630.000 KM, ali je zato veće za cca 400.000 KM u odnosu na ostvarenje u istom periodu prošle godine. Odlukom da se Općina ove godine odrekne katastarskog prihoda, s ciljem da se ublaže posljedice katastrofalne suše u oblasti poljoprivrede, ovogodišnji Budžet bit će prikraćen za dodatnih 700.000 KM. To se svakako mora sanirati do kraja budžetske godine. Od važnijih odluka, koje je ovom prilikom Vijeće usvojilo, navodimo: Odluku

o stipendiranju studenata i učenika srednjih škola, odluku o obrazovanju Komisije za planiranje općinskog razvoja, te više informacija, među kojima o stanju kriminaliteta, bezbjednosti saobraćaja, o ostvarivanju prava i izvršavanju obaveza općinskih službi na zahtjev građana u periodu od 1. 1. do 1. 7. 2003. godine.

1. 10. 2003.

### **GRAČANIČKE "TERME" – ZADOVOLJSTVO NA KRAJU SEZONE**

Zabilježeno je 15.000 posjeta, što je znatno više u odnosu na prošlu sezonu. U izjavi dopisniku "Dnevnog avaza" Hasanu Čaliću, izražavajući zadovoljstvo ostvarenim rezultatima u tek završenoj sezoni, direktor ove firme inženjer Hasan Mostarlić je najavio proširenje kapaciteta i gradnju novog bazena, koji bi trebalo da bude dovršen do naredne sezone.

2. 10. 2003

### **"KOKO-DŽADA" GRAČANICA POSTALA VEĆINSKI VLASNIK PERADARSKOG KOMPLEKSA ODP "KOKA OZREN" U KARANOVCU**

Kupovina kapitala obavljena je u dvije faze: prvo je na tenderu Agencije za privatizaciju Republike Srpske, 30. 9. 2003. godine, "Koka džada" ponudila najbolje uslove i postala vlasnik 30% državnog kapitala u toj firmi. Potom je na aukciji, obavljenoj 2. 10. 2003. godine, od Privatizacijskog fonda "Cepter" otkupila još 25,69% kapitala te firme i tako postala njen većinski

vlasnik sa 55,69% kapitala. "Koka Ozren" u Karanovcu raspolaže sa 14 objekata za uzgoj peradi, od kojih je 8 u funkciji, dok je 6 potpuno devastirano. Zapošljava 19 radnika. Ovo je prvi slučaj prekoračenja međuentitetske granice u procesu privatizacije u Bosni i Hercegovini.

**21. 10. 2003.**

**POVODOM SMRTI ALIJE IZETBEGOVIĆA  
ODRŽANA KOMEMORATIVA SJENDICA  
OPĆINSKOG VIJEĆA GRAČANICA**

Pored vijećnika, sjednici su prisustvovali i istaknuti predstavnici političkog, javnog i kulturnog života sa područja općine Gračanica. O liku i djelu prvog predsjednika i člana Predsjedništva Bosne i Hercegovine, koji je preminuo 19. 10. 2003. godine, govorio je općinski vijećnik dr. Edvin Mulalić.

**23. 10. 2003.**

**PRVA IZLOŽBA KNJIGA TUZLANSKOG KANTONA:  
ZAPAŽEN NASTUP IZDAVAČKE KUĆE "MONOS"  
IZ GRAČANICE**

Od 23. do 26. oktobra 2003. godine, u Bosanskom kulturnom centru Tuzla "desila se" Prva izložba knjiga Tuzlanskog kantona. Organizatori: Ministarstvo obrazovanja, nauke, kulture i sporta Tuzlanskog kantona, Narodna i univerzitetska biblioteka "Derviš Sušić" Tuzla i Bosanski kulturni centar Tuzla. Promovisani sljedeći naslovi: "Pomoćne istorijske

nauke" (Arhiv Tuzlanskog kantona), Godišnjak BZK "Preporod" Tuzla, "Ako nas upoznate, bićemo sretniji" (Udruženje građana "Majke hendikepirane djece"), "Metodologija projektovanja i izgradnja podzemnih prostora" (Rudarski institut Tuzla), "Kradljivci sjenki" (Bosanska riječ), "Bosanske izreke" (Bosnia ars) i "Tranzicija ("Feri" Tuzla)

Iako je odziv izlagača (izdavača) sa područja Tuzlanskog kantona bio više nego skroman, i uz sve manjkavosti i propuste organizatora, valja reći da su ispunjeni glavni ciljevi manifestacije. Ukratko, led je probijen, učinjen je prvi korak i ostvaren bar djelimičan uvid u trenutno stanje izdavaštva na Tuzlanskom kantonu. Izložba je, nema sumnje, oboгатila ovogodišnji program Mjeseca knjige u Tuzli.

Bilo kako bilo, na Prvoj izložbi knjiga Tuzlanskog kantona nastupili su sljedeći izdavači: D.O.O. "Hamidović" Tuzla, D.D. Rudarski institut Tuzla, Javna biblioteka Lukavac, "Bosnia ars" Tuzla, D.O.O "Bosanska riječ" Tuzla, Narodna i univerzitetska biblioteka "Derviš Sušić" Tuzla, Međunarodna galerija portreta Tuzla, D.O.O. "Feri" Tuzla, Arhiv Tuzlanskog kantona, D.O.O. "R & S" Tuzla, D.O.O. za međunarodnu i unutrašnju špediciju Tuzla, Bošnjačka zajednica kulture "Preporod" Tuzla, Udruženje građana "Majke hendikepirane djece" Tuzla, RO UGMM Tuzlanskog kantona – Bihnam club, Printkom Tuzla, i "Monos" Gračanica.

24. 10. 2003.

**"PLAMINGO" GRAČANICA – NOVA  
PROIZVODNA HALA**

Ovaj renomirani proizvođač sanitarnih uređaja i keramike, prepoznatljiv po kvalitetu svojih proizvoda i lijepo sročenom reklamnom porukom, koja je već ušla u uši potrošača, "Lijepo je kupati se udvoje", otvorio je novi pogon za galvanizaciju plastike, opremljen najsavremenijim uređajima i mašinama, sa potpunom obezbijeđenom i sigurnom ekološkom zaštitom, koja čini 15 do 20% te investicije. Nakon puštanja u rad tog modernog pogona, firma izlazi na tržište sa atraktivnim proizvodima za automobilsku industriju, odnosno sa isporukama za već poznatog ino-kupca. U prvoj fazi, posao je našlo 25 novih radnika. U drugoj fazi, nakon uhodavanja te proizvodnje, bit će zaposleno još 30 radnika.

31. 10. 2003.

**TRIDESETŠESTA SJEDNICA OPĆINSKOG VIJEĆA  
GRAČANICA: PREDNACRT BUDŽETA ZA 2004.  
GODINU**

...prihvaćen je sa optimističkim naznakama općinskog načelnika u

ukupnom obimu od 5.944.000 KM ili sa projektovanim od oko 20% u odnosu na predviđeno budžetsko ostvarenje u 2003. godini. U tom okviru planirana su sredstva građana za infrastrukturne projekte (od 400.000 KM, a očekuje se i porast neporeznih i poreznih prihoda. Rashodi su ostali na planiranom ostvarenju iz 2003. godine, što je jedna od smjernica fiskalne politike, koja će i izazvati najviše rasprave u postupku usvajanja Budžeta.

Vijeće je dalo saglasnost za kandidovanje projekata kod Svjetske banke u iznosu od 800.000 KM. Riječ je o projektu regulacije korita rijeke Sokoluše, izgradnji kanalizacionih kolektora, izgradnji lokalne putne mreže u Malešićima, Rašljevi i Džakulama, te izgradnji nekoliko mostova i nabavci kontejnera. Data je i suglasnost da se pristupi aktivnostima, vezanim za nabavku semafora na nekim gradskim saobraćajnicama, prihvaćen prijedlog za osnivanje Mjesne zajednice Buk (do sada u sastavu Džakula), kao i informacija o opravdanosti inicijative Medžlisa Islamske zajednice Gračanica za izmjenu i dopunu regulacionog plana "Centar" oko objekata Osman-kapetanove medrese i Ahmed-pašine džamije.